

Insentif penjawat awam beri impak positif



Perunding Latihan Kanan, Institut Tadbiran Awam Negara (INTAN)

Oleh Dr N Farahin Ali
bhrencana@bh.com.my

Penjawat awam gred 56 dan ke bawah termasuk lantikan kontrak menerima Bayaran Insentif Awal sebanyak RM2,000 pada bulan lalu. Semua jawatan utama sektor awam dan anggota beruniform termasuk polis serta bomba juga menerima insentif awal sebanyak RM1,000.

Insentif RM1,000 turut disalurkan kepada semua pesara kerajaan termasuk veteran berpencen serta tidak berpencen. Dalam hal ini, CUEPACS memaklumkan nilai insentif ini antara tertinggi pernah diberikan kepada penjawat awam dalam tempoh lima tahun lalu.

Ia disalurkan sementara menunggu Kajian Sistem Saraan Perkhidmatan Awam (SSPA) dimuktamadkan dan dibayar sekali gus bagi meringankan beban persediaan persekolahan anak serta persiapan menjelang Ramadan dan Syawal selaras dengan kandungan pembentangan Belanjawan 2024 di Parlimen pada 13 Oktober tahun lalu.

Pemberian ini bukanlah tindakan kewangan se-

mata-mata, sebaliknya langkah strategik memberikan impak positif melalui pelbagai dimensi dengan mengambil kira aspek motivasi dan kepuasan kerja, pertumbuhan ekonomi tempatan dan kesejahteraan masyarakat.

Begitu juga ia bukan hanya penghargaan material tetapi isyarat positif kerajaan terhadap penghargaan dan pengiktirafan kepada usaha keras penjawat awam menyampaikan perkhidmatan kepada rakyat.

Inisiatif ini dipercayai dapat membawa peningkatan motivasi berpanjangan dan kepuasan kerja yang dapat mengubah landskap budaya organisasi terutama dalam perkhidmatan awam semakin mencabar.

Keperluan semakin tidak terhad dan pelbagai sedangkan rata-rata rakyat menghendaki perkhidmatan awam lebih cepat dan cekap. Jangkaan dan bebanan tugas semakin meningkat berbanding purata gaji diterima lebih rendah berbanding sektor swasta memberikan tekanan tinggi kepada penjawat awam.

Justeru, insentif ini dapat merangsang komitmen, meningkatkan produktiviti dan menyumbang kepada keharmonian di tempat kerja.

Malah, insentif juga memberikan kesan limpahan kepada ekonomi tempatan kerana jumlah penerimaanya sekurang-kurangnya 2.3 juta orang dan strategi

pemberian secara sekali beri ini memudahkan perancangan kewangan dan meningkatkan kuasa beli.

Ini akan meningkatkan kadar pembelian barang terutama persediaan persekolahan, keperluan pakaian dan makanan sempena Ramadan serta Syawal, sekali gus memacu kesan domino positif dengan faktor pengganda besar terhadap sektor perniagaan tempatan.

Oleh itu, ramai penjawat awam lega kerana mempunyai dana tambahan bukan sahaja untuk persediaan persekolahan anak, bahkan sambutan perayaan. Walaupun nilai diterima mungkin tidak cukup menampung keseluruhan perbelanjaan, sekurang-kurangnya ia dapat membantu mengurangkan beban kewangan dan tekanan.

Hakikatnya, pemberian bayaran insentif kepada penjawat awam serta pesara kerajaan tidak hanya memberikan impak kewangan positif semata-mata, bahkan membawa impak positif pada aspek motivasi, pertumbuhan ekonomi tempatan dan kesejahteraan masyarakat secara menyeluruh.

Ia memberi petanda awal dan menyuburkan harapan penjawat awam kepada komitmen kerajaan dalam merealisasikan pembangunan SSPA lebih mantap untuk peningkatan kebajikan mereka.